

Erich Bolinius

Erich.Bolinus@t-online.de

**(Bericht über den BSV Kickers Emden - Sendung „Flutlicht“ auf Radio Ostfriesland
Donnerstag, 15.3.2012 18.05 Uhr auf 94.0 bzw. 87,7)**

Moin, leev Toehörers,
mit 'n Spölbericht van de 1. Mannskupp van Kickers Emden kann ik disse Week neet denen.
Man van twee Jögdspölen kann ik so 'n bietje vertellen.
De C-Junioren van Kickers Emden hebben tegen Victoria Georgsmarienhütte mi 1:0 wunnen.
Dormit kunnen de Jungs drie Spölen achternanner elksmaal 3 Punkten infahren. Dormit kann
man sük van de Ofstieglplatzen 'n bietje ofsetten. Un 'n Sieg tegen 'n Mannskupp, de ok
unnern mit drin steiht, de tellt bekanntlich dübbelt. Beid Mannskuppen spölten
hoogmotiveert, villicht ok dorum, umdat man dit Maal in de Oostfreeslandstadion spölen
dürs.
De U19-Mannskupp spölte tegen Stade 2:2. Dat 0:1 för Kickers full heel unglückelk. Kickers
harr dorna verscheden Mögelheiden för Toren. Man de wurren all heel lichtsinnig vergeven.
Un as dat immer so is, de Gegner maakt ut Nix 'n Tor. Mit 0:2 gung dat in de Paus. De Jungs
van Kickers riskerten nu Alls, un al fröh full dat 1:2. Kickers hat dorna meeneg Torkansen,
man dat dürs bit toe de 94. Menüte as **Tuitjer** in de Straafruum umhauen wurr un **Blohm** de
Elfer seken in 't Tor unnerbrengen kann. Dorna was de Freid bi Spölers un Trainers van de
U19-Mannskupp natürelk groot.

Man ok för de Fans van de 1. Mannskupp van BSV Kickers Emden giff dat goed Narichten.
De Rotenburger SV hett fast toeseegt, an 31. Märt in Emden toe dat ansette Oberligaspöl
antoetreden. Man Kickers kann al een Week vörher bi de RSV Göttingen 05 antreden. Dat
Spöl an disse Weekenenn tegen Braunschweigs 2. Mannskupp fällt dotregen ut. Is skaa dat 'n
Vereen, wor de erste Mannskupp in de 2. Bundesliga spölt un van VW heel düchtig sponsert
word, in Emden wegen de Geldutgave neet antreden deit.
Neet 'n heel so goed Naricht giff dat van een Spöler van Kickers Emden. **Michael
Kleinstauber** hett sük in 't Training verletzt un fall minnestens 2 Maand ut.

Man Kickers Emden plaant ja ok al för de komende Saison. So hemmen de beid A-
Jögdspölers ut de Neddersassenliga, **Marco Borchers** und **Gökan Batbay**, för de eerst
Heeren unnerschreven. Hör was de Unnerschrift liggt fallen, vertellten de Beiden, umdat se
hörs Trainer **Yasin Turan** ja behollen denen. Al in de komende Week wölen noch drie
Spölers för de Landesligamannskupp van Kickers Emden unnerschriev. So man wieder,
meen ik, dann kann dat in de kommende Saison doch noch wat worden.
De Vertreder van de Stadtsportbund Emden, **Reiner Mensen**, hett lesd Sönnidag bi de
Sportlerehrung in „Rummel“ seggt, dat dat upstünns bold keen Spitzensport in Emden mehr
giff. Na ja, heel so schlecht see ik dat neet. In verscheden Sportaarden stahn wi in Emden heel
goed dor, meen ik.
Ok Kickers Emden kummt in de komende Jahren weer hoog, dorvan bün ik overtügt. Dorför
mutt aber ok noch eeniges daan worden. Insbesünner van de Vörstand, man ok van de Fans!

So, as alltied toe Schluss, noch Foetballwitz.
„Angeklagte, Se bestrieden also neet, hör Mann bin Foetballoverdragen dootskoten toe
hebben?“
„Nee, Herr Richter.“
„Wat wassen sien lesd Woorden?“ - "Skeet doch, Skeet doch ennelk, du oll Piep."
So, leev Toehörers van Radio Oostfreesland,

ik hoop, Joe hett dat Plattdütsk gefallen, denn mien Motto heet ja alltied,
plattdütsk dürt nettso as Kickers Emden – neet unnergahn.

Bit anner Maal

Joe

Erich Bolinius

ut Emden-Petjem.